



SIARAN MEDIA

UNTUK SIARAN SEGERA

BELANJAWAN 2026 : MANFAAT KEPADA PEMINJAM PTPTN DAN KELESTARIAN PENDIDIKAN TINGGI NEGARA

1. Pembentangan Belanjawan 2026 bertemakan Belanjawan MADANI Keempat: Belanjawan Rakyat oleh Yang Amat Berhormat Dato' Seri Anwar bin Ibrahim, Perdana Menteri dan Menteri Kewangan pada 10 Oktober 2025 (Jumaat) akan memberikan manfaat kepada peminjam Perbadanan Tabung Pendidikan Tinggi Nasional (PTPTN).
2. Sebagai agensi di bawah Kementerian Pendidikan Tinggi (KPT), PTPTN menyambut baik pengumuman inisiatif-inisiatif di bawah Belanjawan 2026 dan merakamkan setinggi-tinggi penghargaan serta terima kasih kepada Kerajaan atas keprihatinan terhadap kebajikan peminjam dan pelajar. Inisiatif yang diumumkan adalah seperti berikut:
 - i. Pendidikan percuma PTPTN melibatkan 5,800 anak-anak keluarga miskin yang mengikuti pengajian di Institusi Pendidikan Tinggi Awam (IPTA) dengan peruntukan RM120 juta setahun;
 - ii. Pengecualian bayaran balik PTPTN kepada semua mahasiswa yang perolehi Ijazah Sarjana Muda Kepujian Kelas Pertama di IPTA dari keluarga pendapatan rendah dan menengah. Ini memberi manfaat sekitar 6,000 peminjam dengan peruntukan RM90 juta setahun; dan
 - iii. Sekatan perjalanan ke luar negara kepada peminjam yang mampu bayar dan bekerja di luar negara tetapi culas membuat bayaran balik.

3. Kerajaan sentiasa prihatin terhadap kebajikan pelajar daripada keluarga miskin. Selaras dengan komitmen memastikan akses pendidikan tinggi yang inklusif, pinjaman PTPTN kepada pelajar daripada keluarga miskin dan miskin tegar berdasarkan data e-Kasih yang melanjutkan pengajian di IPTA akan ditukar kepada biasiswa bermula tahun 2026. Langkah ini diharap dapat meringankan beban kewangan pelajar dan memberi ruang kepada mereka untuk menumpukan sepenuh perhatian terhadap pengajian.
4. Kerajaan juga terus menitikberatkan usaha melahirkan graduan berkualiti tinggi di Malaysia. Sehubungan itu, pelajar digalakkan untuk menumpukan sepenuh perhatian terhadap pengajian dan mencapai kecemerlangan akademik. Sebagai penghargaan kepada mereka yang berjaya memperoleh Ijazah Sarjana Muda Kepujian Kelas Pertama di Institusi Pendidikan Tinggi Awam (IPTA), Kerajaan memberikan pengecualian bayaran balik pinjaman PTPTN untuk peminjam berpendapatan B40 dan M40.
5. Pada masa yang sama, Kerajaan menekankan kepentingan kelestarian dana PTPTN demi memastikan generasi masa depan turut berpeluang menikmati kemudahan pembiayaan pendidikan tinggi. PTPTN merupakan kemudahan pinjaman yang perlu dilunaskan semula bagi menjamin kesinambungan dana kepada peminjam baharu. Oleh itu, sekatan perjalanan ke luar negara akan dilaksanakan secara bersasar kepada peminjam PTPTN yang mempunyai tunggakan.
6. Inisiatif yang diumumkan ini mencerminkan semangat pembaharuan nasional dan komitmen Kerajaan dalam melaksanakan agenda Malaysia MADANI yang menekankan kesejahteraan rakyat serta kelestarian pendidikan negara. Perincian lanjut berkenaan pelaksanaan inisiatif-inisiatif ini akan diumumkan oleh PTPTN dalam masa terdekat.

YBhg. Dato' Seri Norliza Abdul Rahim
Pengerusi
Perbadanan Tabung Pendidikan Tinggi Nasional (PTPTN)

12 Oktober 2025